

Reliqua velocius percurramus. Idem Socrates ad gloriam aspirantibus, quæ ingens turba est, rectum ac compendiosum callem, non omnibus sanè notum designabat, ut scilicet, Talis quisque fieret, qualis videri cuperet: Simplex virtutis studium sectandum dicens, simulationis atque hypocrisis viam relinquendam, quæ producere quo pollicentur nequeunt. Idem ab adolescente dubio consultus, Nuptiasné contraheret, an in cœlibatu permaneret? ratus fore, ut quicquid dixisset, ab illo magna fiducia susciperetur. Hac errorem responsione discussit: Falleris, inquit, si velut è duobus bonis quod sit melius expectas, utrinque difficultates ac molestiæ, hic angor tædiumque solitudinis, stirpis defectio, externique dolor hæredis: Inde iugis querelarum ac curarum sarcina, dotata conjugis audacia, socrus repuerascentis procacitas, fastidium propinquorum, adulterorum merus, anceps exitus natorum: Deinceps ipse tibi consule, & quæ tolerabilia videantur elige. Alterum adolescentem cum vidisset insignem vultu atque habitu, sed tacitum: Loquere, inquit, ut te videam proprie quidem, quoniam

9. iij.